





# **Акафист**

## **святой благоверной княгине**

### **Иулиании Вяземской**

#### **Кондак 1**

---

Избранную от великоименитаго боярскаго рода, женскую слабость мужески поправшую и разжженнаго похотью мучителя чистотою своею посрамившую, Иулианию славную, вернии, песньми почтим, точит бо нам неоскудно исцеления и молит о спасении всех, зовущих ей:

Радуйся, Иулиание, благоверная княгиня целомудренная.

#### **Икос 1**

---

Ангелов сожительница и страстотерпцем сопричастница быти сподобилася еси, всечестная Иулиание, ангельскую бо чистоту от пелен сохранила еси и тоя ради мученическую кончину доблественно восприяла еси: и ныне со ангельскими лики и мучеников сонмы Престолу Всесвятая Троицы предстоящи, моли о

помиловании нас, приносящих ти похвальная сия:

Радуйся, даров духовных исполненная; радуйся, венцем мученическим украшенная. Радуйся, непоколебимый во искушениях терпения столпе; радуйся, твердое во обстоятельствах мужества основание. Радуйся, добродетели неувядаемый цвете; радуйся, лозы Христовой многострадальная розго. Радуйся, благочестия честное прозябение; радуйся, чистоты доброто и похваление. Радуйся, голубице, крыла позлащенная имущая; радуйся, теми в райская обители взлетевшая.

Радуйся, Иулиание, благоверная княгиня целомудренная.

## **Кондак 2**

---

Видящи мати твоя, благоверная Иулиание, всю скорбь и тяготу вдовства своего, еще малолетней ти сущей моляще Всесильнаго Бога, да возрастит и усовершит тя Своею благодатию, и купно с тобою пояше Ему: Аллилуия.

## **Икос 2**

---

Разумом непомраченным греховными страстьми издетска разумевши необуменного

Бога, Иулиание богомудрая, несумненно в Того веровала еси, и неизреченныя и спасительныя повеления Его соблюдши, подвизаеши пети тебе званию сими:

Радуйся, ум свой к Божественней высоте вперившая; радуйся, одеяние души твоей чистотою украсившая. Радуйся, силу Божию в немощном естестве своем показавшая; радуйся, венец победный от Десницы Живоносныя приявшая. Радуйся, цвете чистоты, среди кала греховнаго проросший; радуйся, крине целомудрия, посреди терния похотей душегубительных процветший. Радуйся, чистая ластовице; радуйся, красная горлице. Радуйся, яко в молитве тайно бдела еси; радуйся, яко писаньми богодухновенными насладилася еси.

Радуйся, Иулиание, благоверная княгиня целомудренная.

### **Кондак 3**

---

Силою благодати Божией сохраняема, блаженная княгиня Иулиание, во благочестии от юных лет возрастала еси, и от силы в силу, и от славы в славу восходила еси, воспевающи укрепляющему тя Богу благодарственную песнь: Аллилуия.

## Икос 3

Имуци в сердце своем огонь любви ко Христу Богу, грех и нас ради человек распеншагося Господа, выну помышляла еси, прехвальная Иулиание: темже ко страстем себе от младенства приуготовила еси и научила еси всех вопити тебе сице:

Радуйся, любовь ко Христу в себе возжегшая; радуйся, тоя ради любви тягчайшия муки претерпевшая. Радуйся, яко Жениха Безсмертнаго возжелала еси; радуйся, яко Тому в дар страдания своя принесла еси. Радуйся, яко красотою страданий твоих Прекрасному Жениху Христу уподобилася еси; радуйся, яко Крест Господень на рамо взявши, воздержанием Сему последовала еси. Радуйся, благочестия ревнительнице; радуйся, на врага добляя победительнице. Радуйся, яко тобою от нечистых похотей избавляемся; радуйся, яко тобою от пагубных страстей свободяемся.

Радуйся, Иулиание, благоверная княгиня целомудренная.

## Кондак 4

---

Бурю жития долу влекущаго, и наслаждения красоты, и славу цветущую, яко временну оставльши, блаженная Иулиание, добротою красною целомудрия распалема, ко Христу прилепилася еси, поющи Ему: Аллилуия.

## Икос 4

---

Слышавши богоименитая Иулиание иерея некоего сказания о подвизех мучеников, Христа Господа больши живота своего возлюбльших и за имя Христово смерть радостно приявших, ревностию о подвизех сих воспламеняшеся и к святости и чистоте христианстей понуждашеся. Мы же, ведуще сия, восхваляем ю сице:

Радуйся, яко о подвизех мученических возревновала еси; радуйся, яко славу маловременную презрела еси. Радуйся, добротами божественныя красоты украшенная; радуйся, красоту духовную и доброту телесную в себе сочетавшая. Радуйся, благоухания духовнаго нас исполняющая; радуйся, тьму бесовскую далече отгоняющая. Радуйся, благ духовных и телесных подательнице; радуйся, у Престола Божия за нас присная ходатаице.

Радуйся, яко о Господе ликуеши; радуйся, яко лучами благодати Божией исполняеши.

Радуйся, Иулиание, благоверная княгиня целомудренная.

### **Кондак 5**

---

Богосиянную звезду, от града Торжка возшедшую и небесными светлостьми возсиявшую, видим тя, всехвальная княгиня Иулиание: и ныне во светлостех мучеников святых пребываеши, купно с ними восхваляючи Светоподателя всяческих и поющи Тому: Аллилуия.

### **Икос 5**

---

Видев тя беззаконный князь Юрий, елико душевною красотою сияющую, тако и телесным добротством блистающую, и похотью нечистою распалям, восхоте обольстити тя. Ты же, всечестная Иулиание, рачение плоти превозмогши, яко воистину крепкий адамант целомудрия явилася еси. Сего ради любовию вопием ти:

Радуйся, чистоты забрало боговидное; радуйся, естества цвете благороднейший. Радуйся, елеем благочестия преукрашенная;

радуйся, чистоту душевную и телесную соблюдшая. Радуйся, в женском естестве мужескую доброту явившая; радуйся, невидимую державу противных сил победившая. Радуйся, паче сильных мужей крепчайшая; радуйся, премудрых века сего мудрейшая. Радуйся, яко врага льстивого крепкая сопротивоборница явилася еси; радуйся, яко мужески подвиг претерпела еси.

Радуйся, Иулиание, благоверная княгиня целомудренная.

### **Кондак 6**

---

Проповедник твоей чистоты и праведности явился мучитель твой, святая княгиня Иулиание, ты бо доброте красней души твоя страстьми осквернится не стерпела еси, доброту несказанную честнаго Жениха твоего уразумевши и плотскую любовь твердо отвергла еси, воспевающе Христу Богу победную песнь: Аллилуия.

### **Икос 6**

---

Возсияла еси светлостью добродетелей твоих, преславная Иулиание, и подвигом мученическим украсилася еси. Темже паче

солнца сияеши и просвещаеши всех, твою светоносную память совершающих верно и приносящих ти хваления сия:

Радуйся, мужественная мученице; радуйся, плотских страстей целительнице. Радуйся, яко крин добродетельми твоими процветшая; радуйся, целомудренным путем шествовавшая. Радуйся, адскую гордость отвергшая; радуйся, небесную сладость возлюбившая. Радуйся, пламень похоти разжженные мудрованием угасившая; радуйся, свещу душевную неугасимую соблюдшая. Радуйся, яко стремление нечистоты опалила еси; радуйся, яко на высоту добродетелей взошла еси.

Радуйся, Иулиание, благоверная княгиня целомудренная.

### **Кондак 7**

Хотя ласкосердый мучитель похоти своея желание улучшить, ласкательными словесы и мольбы многими и коварством и прещении грозными соблазнити тя покушашеся: ты же, всеславная, плоти мудрование отвергши, болезненно вопияла еси: не разлучит мене любви Христовой ни славы обещание, ни мук

прещение, и радостно взывала еси Ему: Аллилуия.

## Икос 7

---

Новую безчеловечия ярость показа неистовый мучитель твой, досточудная Иулиание, егда слугам повеле сотворити ног твоих отъятие и рук отсечение и в реку Тверцу вовреци бездыханное тело твое. Мы же таковому зверонравию содрогающеся, твоя страсти восхваляюще, вопием ти сице:

Радуйся, мучеников радование; радуйся, целомудренных похваление. Радуйся, струями кровей твоих землю оросившая; радуйся, отсечение удов телесных претерпевшая. Радуйся, к лику мученическому сопричтенная; радуйся, одеждою чистоты испещренная. Радуйся, кровию своею освятившаяся; радуйся, тлителя целомудрия поправшая. Радуйся, яко сердечным рачением твоим Ангелы удивила еси; радуйся, яко мужеским сплетением врага невидимого низложила еси.

Радуйся, Иулиание, благоверная княгиня целомудренная.

---

## Кондак 8

---

Странствия земнаго течения мученически скончавши, ко Христу, Непреступному Свету, возшла еси, достохвальная Иулиание. Ему же ныне предстоиши духовно ликовствующи и воспевающи радостную песнь: Аллилуия.

## Икос 8

---

Всю лесь змеину низложила еси, и Ангельские лики возвеселила еси, преблаженная Иулиание, на камени бо твердо целомудрия утвердившеся, убийцу врага посрамила еси и венец победный от Христа Царя достойно восприяла еси. Сего ради слышиши от нас похвалы сия:

Радуйся, духом своим безплотныя удивившая; радуйся, мужеством своим тех возвеселившая. Радуйся, в жертву себе Богу предавшая; радуйся, жертва благоприятная Тому явившаяся. Радуйся, яко страсти многих мук претерпела еси; радуйся, яко к сиянию незаходимаго света преставилася еси. Радуйся, тела мертвенного не пощадившая; радуйся, бессмертие неизживаемое наследовавшая. Радуйся, яко преступнаго мучителя советы

избегла еси; радуйся, яко страдальческим путем во обители Небесныя взошла еси.

Радуйся, Иулиание, благоверная княгиня целомудренная.

### **Кондак 9**

---

Всецелу себе самою Богу принесла еси, богомудрая Иулиание, и Божественную силу в немощи своей совершила еси, в женстем естестве невидимую державу и силы ея победивши. Тем же убо во дворы Господа твоего, яко дева мудра свещу носящи вошла еси, поющи Тому хвалебную песнь: Аллилуия.

### **Икос 9**

---

Витий красноглаголивых лик не возможет достойно восхвалити тя, всехвальная Иулиание, како бо ты чудодетельне явила еси тело твое, противу быстрин речных плывуци, разслабленному некоему, по берегу Тверцы идущему. Таковому промыслению о тебе Божию чудящися, во умилении сердец наших приносим ти похвальная сия:

Радуйся, зарями чудес твоих сияющая;  
радуйся, богато нам чудесы источающая.  
Радуйся, яко каплями кровей твоих души твоей

багряницу многоценну исткала еси; радуйся, яко теми в ризу нетленного веселия одеялася еси. Радуйся, елей Божия Благодати искапающая; радуйся, яко благовонный фимиам ко Христу Богу вознесшаяся. Радуйся, тленную славу презревшая; радуйся, венцем нетления венчавшаяся. Радуйся, яко страданьми твоими, яко злато в горниле, искусилася еси; радуйся, яко честное жилище Спасу Христу соделалася еси.

Радуйся, Иулиание, благоверная княгиня целомудренная.

### **Кондак 10**

---

Спаستися хотя всем человеком Щедродатель Господь дарова нам святое тело твое, блаженная Иулиание, яко сосуд избранный и источник благодатный, от негоже вей вернии токи исцелений черплюще, выну вопиют прославльшему тя Богу: Аллилуия.

### **Икос 10**

---

Стена еси твердая и крепкое забрало граду нашему, святая мученице Иулиание, и всех, с верою и любовью прибегающих к тебе, знамений дивных исполняеми о величии

явльшагося в тебе Бога вещающих. Сего ради прими от нас пения сия:

Радуйся, чудеса возсиявшая; радуйся, цельбы нам источающая. Радуйся, страстей лютых утоление; радуйся, в скорбех сущих заступление. Радуйся, недуги неисцельныя врачующи; радуйся, огненное опаление уставляющи. Радуйся, источниче исцелений неоскудеваемый; радуйся, сокровище Божиих дарований неизживаемое. Радуйся, яко духи лукавыя отгоняеши; радуйся, яко в печалех всем помогаеши.

Радуйся, Иулиание, благоверная княгиня целомудренная.

### **Кондак 11**

---

Пению нашему похвальному вонми, угоднице Божия Иулиание, аще бо и ни единоеже наше слово довольно было, во еже по достоянию воспевати тя, уповаем бо тобою прощение согрешений наших получитьи и милость от Благodeющего всяческих уллучити, да вкупе с тобою воспоем Ему: Аллилуия.

---

## Икос 11

Светозарными сияньми Христа, Невечерняго Солнца, душу и сердце свое озарила еси, богомудрая Иулиание, и к Нему утреневала еси: темже и к Свету присночудному преложилася еси. Им же просвещаеши всех, любовьию почитающих тя и приносящих ти сицевая:

Радуйся, в чертоги Небесныя вселившаяся; радуйся, к вечным обителем преставившаяся. Радуйся, к Свету невестественному возшедшая; радуйся, целомудрия любовьию в горняя скиния вознесшаяся. Радуйся, яко благодати Христовы благоуханием в небеснем вертограде ныне исполняеши; радуйся, яко Божественныя славы зрением во обителех светозарных ныне утешаеши. Радуйся, доблественная страсотерпице; радуйся, вечного блаженства наследнице. Радуйся, яко мрак страстей разгоняеши; радуйся, яко славою Божию исполняеши.

Радуйся, Иулиание, благоверная княгиня целомудренная.

## Кондак 12

---

Благодать прияла еси страсти плотския целити, прехвальная мученице Иулиание, и нас, усердно воспевающих тя, душевных и телесных болезней избави твоими яже к Богу молитвами, да дерзновенно вопием Ему: Аллилуия.

## Икос 12

---

Поюще подвиги твоего предивнаго жития, твоя преславная и богатоделательная благодеяния, тобою нам дарованная, ублажаем тя, блаженная княгине Иулиание, блаженна бо воистину явилася еси и в житии твоём, и в смерти, и по смерти твоей. Сего ради воспеваем тя блаженми сими:

Радуйся, нищету духовную возлюбившая; радуйся, вся красная мира сего презревшая. Радуйся, в плаче о Господе слезами очи своя оросившая; радуйся, правды небесныя возжаждавшая. Радуйся, земли кротких наследнице; радуйся, преудобренная страстотерпице. Радуйся, милость от Бога восприявшая; радуйся, чистотою сердечною Того узревшая. Радуйся, яко миром духовным

облагоухаеши; радуйся, яко мзду небесную достойно восприяла еси.

Радуйся, Иулиание, благоверная княгиня целомудренная.

### Кондак 13

О святая мученице, благоверная княгиня Иулиание! Тебе, у Престола Господа Славы молящейся за ны, мы, грешнии, на земли живущии, приносим хвалебное сие благодарение и усердно просим тя: моли Всещедраго Бога пробавити милость Свою на землю Российскую, утвердити ны в православии и благочестии, даровати нам прощение согрешений, избавитися нам от напрасныя смерти и будущия муки, да с тобою во веки поем Ему: Аллилуия.

(Этот кондак читается трижды, затем икос 1-й и кондак 1-й)

